

【自由】李淑娟原作

自由，係一種力量，一種夢想，一生人个追求，因為自由做得帶來快樂。頭擺到這下幾多人為著自由打拚，就算付出錢銀、犧牲生命也毋驚。吾姆就係一個「無自由，甘願死」个人！

厝屋下附近个傳統市場安到「自由市場」，臨暗頭開始賣。時間一到，市場裡背一盞一盞黃黃光光个電球仔陸陸續續點著，攤仔个商品一項一項排出，市場像目陰目陽个巨人，一息一息散氣返魂。跔等佢展現生命力量，附近个伯姆叔婆、阿姨、阿姑做下出動哩，連外勞也煞煞搵等中風个老伯姆來參加這逐日舉辦个「拍賣會」，這就係「自由」个魔力。

吾姆係一個小學先生，學生仔放學過後，圍咗一日个壓力，就愛「自由」一下去市場買東西，為臺灣个經濟做貢獻。佢這個孝子輒常愛陪阿姆去遠市場順續仔搵搵東西，三不時還愛試食點評，阿腦阿姆買東西个孔竅：這家个鹹豬肉毋會死鹹、該家焙个煙腸毋會忒肥、前排賣个魚仔較萋頭，後頭个愛玉仔係佢最好食个……。跔等交關過个攤仔緊行緊多，阿姆个皮包仔緊來緊凹，吾手項个油紙袋仔也緊來緊重。

「自由」个商品百百種，做得講係「麼个都有，麼个都賣，麼个都無奇怪」。阿姆毋單止在這位買各種食材同衫褲鞋襪，還有連遮仔、被骨、鏝頭、電扇這兜分佢恁毋解个生活用品也會買。有一年八月半，家家屋屋愛烤肉，市場頂尖到就像入年假樣仔，逐儕人使錢都像背銃仔相戰。阿姆滿面紅光，看起來比相打雞還較有精神，佢摻手項个袋仔交分佢過後，就單人獨馬舂入前線，等佢再舂出來个時節，當風神个拿等厥戰利品——舂馬桶个蓋仔。

「金錢當珍貴，生命價值高，若係為自由，麼个都無愛。」雖然吾姆逐擺去自由市場買東西，總係拿出煞手又毋驚死个精神來消費，其實佢知佢全係為著屋下大細，屋下麼人好食麼个，好咁麼个，麼人好著仰仔个衫褲，需要麼个東西……，佢全記在心肝肚毋識添放忒。

阿姆在「自由」裡肚買屋下人个需要，在「自由」裡肚準備屋下个燒暖。阿姆追求个「自由」，凝等屋下人个幸福。